

Darob recht wahrnehmen möge/ zu welchem Ende/ so werden Eiserne geschrauffte / mit ihren beeden Schenckeln außwarts sehende Zirckel verordnet/ mit welchen man alsdann gar füglich/ in die tieffe der halben rundung hinunder/ Haar/ auff Haar/ reissen kan.

Nun ligt in hiegegenwertiger Ersten Figur / die von Holz gedrehte / Die Erste  
inwendig/ so wol auff ihrem Kanfft oben / mit weisser ölfarb angestrichene Figur.  
ne Cuba, wie sie dann an ihrer eigentlichen grösse ist gemacht worden /  
(. in welcher grösse sie dann auch zu den kleinen Sonnenvhren/von ihr abzutragen/ noch wol zugebrauchen ist .) vor Augen / dann erstlich so muß der ganze innere Kanfft oben herumher / mit höchstem fleiß/ in .4. gleiche theil abgetheilt/ auff ihne/ die .4. Partes Mundi als da seynd

Oriens, Occidens, Meridies, vnd Septentrio, bezaichnet werden. Zehunder so wird jedoch nur ein dergleichen Viertel/ inwendig verstandend / das seye von .h. gegen a. gemaindt/ im .90. grad, mit höchstem fleiß getheilt/hiezugegē aber/ allein von einem/biß auff .60. derselben grad, (. dieweil man doch genug an disen zugebrauchen hat .) auff den Kanfft gerissen / darmit die hernachfolgende himmelische Zeichen mit den noch vberigen gradi. nit bedeckt werden. Man mercke aber wol / daß/ wann ich in hernachfolgender ganzen beschreibung von gradibus etwas melden werde/ daß allezeit eben dise/ sollen gemeint vnd verstanden werden.

Nun seynd die gedachte gradus gestelt / an jeso so wird der geschrauffte/auff beeden Schenckeln außwarts sehende Zirckel/ mit dem einen Spizen/ auff des Kanffts innere Eck/ in  $\Delta$ . gestelt / vnd so weit eröffnet/ biß daß der ander Spizen in den Puncten .h. auch oben am Eck des Kanffts einschlägt/ alsdann den Zirckel mit seiner habenden Schrauffen bestetiget / daß er nicht mehr weichen könne. Man lasse aber den ersten Spizen im Puncten  $\Delta$ . stehn/ vnd reisse mit dem andern Spizen von h an / durch die ganze inwendige Rundung / vber den vndersten Puncten des Bodens .\*. der Cuba hinab / biß wider zu .I. hinauff/ ein halbe Zirckellini. Ferner so nemme man den an seiner weite /